



Inatsisartuni ilaasortaq Naaja H. Nathanielsen, Inuit Ataqtigiit
/Maani

§ 37 naapertorlugu apeqqut nr. 2013/242-mut akissuteqaat: Killavaat Alannguanni ingerlassamut Tanbreezimut tunngatillugu tusarniaatitsinermi piffissarititaasup naanissaanut ullut arfinilinngornerini paasissutissanik nutaanik tunniussisoqarsimasoq ilumoorpa?

17.12.2013
Sags nr. 2013-093198
Dok. nr. 1425500

Postboks 1614
3900 Nuuk
Tlf. (+299) 34 50 00
Fax (+299) 34 54 10
E-mail: apn@nanoq.gl
www.nanoq.gl

Asasara Naaja H. Nathanielsen,

3. december 2013-imi § 37 naapertorlugu Naalakkersuisunut apeqqut, matuma siuliani allassimasoq nassiuppat. Apeqquteqaammi immikkoortunik tallimanik apeqqutitaqartumi tunngavilersuutitut allapputit:

Ingerlassamut Tanbreezimut tunngatillugu tusarniaatitsineq ippassaq, 2. December, naavoq. Nalunaarutit attuumassuteqartut tusarniaatitsinerup naanissaanut ullut arfiniliinnangortut nassiunneqarsimani pissutigalugu ullumikkut NGO-t tusarniaatitsinermi piffissap tallineqarnissaanik qinnuteqarput. Tamanna eqquuppat tusarniaatitsinermut suliarilluakkamik akissutissiornissamut piffissaqartitsisoqanngilaq.

Apeqqutitit tallimaasut oqaasertaat tamakkerlugit issuarlugit akissuteqaatinnut ilangguppakka.

1) Killavaat Alannguanni ingerlassamut Tanbreezimut tunngatillugu tusarniaatitsinermi piffissarititaasup naanissaanut ullut arfinilinngornerini paasissutissanik nutaanik tunniussisoqarsimasoq ilumoorpa?

Naamik, Killavaat Alannguanni Tanbreez-ip suliassaanut tunngatillugu tusarniaatitsinermi piffissarititaasup naanissaanut ullut arfinilinngornerini Naalakkersuisut najoqqutassanik allanik saqqummiussaqaanngillat.

Kisiannili Tanbreez 28. november 2013-imi Aatsitassanut Oqartussaasunit kajumissaarneqarluni ingerlatseqatigiiffiup VVM-imut nassuiaatissatut missiliusiaani ingerlatseqatigiiffimmit innersuussiffiusunut uppernarsaatit nittartakkaminut ikkuppai, uunga: www.tanbreez.com.

Najoqqutassat, 4. september 2013-imi ingerlatseqatigiiffiup VVM-imut nassuiaasiassaanut missingiutitut tusarniaanermut iserfissiami tamanut ammasumik tusarniaassutigineqarlutik saqqumitinneqartut allannguuteqartinneqaanngillat. Kisiannili Tanbreez-ip uppernarsaatinik taaneqartunik saqqummiussineranut ilassutitut tusarniaanermut iserfissiami oqaaseqatigiinnik imaattunik ikkussisoqarpoq:

Nutaarsiassaq: Teknikkikkut nalunaarutit annertunerusut tusarniaanermut attuumassuteqanngitsut uani aaneqarsinnaapput Tanbreez Mining Greenland-ip nittartagaani uani www.tanbreez.com uumap ataani: <http://tanbreez.com/en/reports/>.

VVM-imut najoqqutassianut tusarniaanermut iserfissiakkut saqqummiunneqartunut tunngatillugu ilisimatitsissutigisinnaavara, Aatsitassanut Suliassaqarfimmi Avatangiisinut Aqutsisoqarfiup Tanbreez-ip VVM-imut nassuiaatissatut missingiuusiaanik oqartussaasutut suliarinninneranut atatillugu, Nationalt Center for Miljø og Energi (DCE) aamma Pinngortitaleriffik (GN), ilisimatusarnikkut attuumassuteqanngitsutut siunnersortasut suleqatigalugit missingiuusiaq naliliiffigisimammagu. Ingerlatseqatigiiffiup VVM-imut nassuiaammut missingiuusiaanut ilanngussanik ilaliussisoqanngilaq.

DCE aamma GN naliliinerminni inaarutaasumi eqikkaapput, ingerlatseqatigiiffiup VVM-imut nassuiaatissatut missingiuusiaa suliasap avatangiisinut sunniutissaanut tamakkiisumik takussutissiisooq. DCE-mit aamma GN-imit allakkiami, tusarniaanermut iserfissiami tusarniaanermi najoqqutassat akornanniittumi allassimavoq:

” DCE/GN VVM-imut siusinnerusukkut nalunaarusiasimasut, ilaliussanik ilaqartinneqartut oqaaseqarfigissallugit periarfissaqarsimapput, tamatumalu kingorna nalunaarusiat allannguutissatut pisariaqartitanut, DCE/GN-imit siunnersuutigineqartunut naleqquttunngorlugit iluarsineqarput.

Nalunaarusiaq tusarniaanermi iserfissiami takuneqarsinnaasoq tamanik saqqummiussiviusutut, aammalu aatsitassarsiorfiup pilersaarutigineqartup avatangiisinut sunniutissaanik nassuiaaffiusutut DCE/GN-ip isumaqarfigaa.”

VVM-imut nassuiaatissatut missingiutip nassiunneqartup, 2013-imi aggustimeersup malitsigisaanik suliasap avatangiisinut sunniutissai tamakkiisumik takussutissiorneqarsimasutut naliliiffigineqarput, kiisalu missingiusiaq aatsitassanut ikummatissanullu inatsimmi VVM-imut nassuiaatip ilusilernerneqarnissaanut imaanullu piumasaqaatinik naammassinniffiusutut naliliiffigineqarmat, missingiusiaq taaneqartoq tamanut ammasumik tusarniaanermi atorineqarpoq.

2) Paasissutissat taakku siusinnerusukkut tunniunneqarsimannginnerannut suna patsisaava?

Ingerlatseqatigiiffiup VVM-imut nassuiaatissatut missingiutaata akuerineqarneranut atatillugu, Aatsitassanut Suliassaqarfimmi Avatangiisinut Aqutsisoqarfiup ingerlatseqatigiiffik qinnuigaa, innersuussiviusunut uppersaasatit matuma siuliani taaneqartut allatut iliorluni atuartussanut soqutiginnittunut pissarsiarinnaalerseqqullugit, soorlu ingerlatseqatigiiffiup nittartagaatigut pissarsiarineqarsinnaalersinnerisigut, aamma taakkua qinnuteqarnermut najoqqutassani ilaangikkaluartut. Taamaaliortoqassasoq ingerlatseqatigiiffimmit nalunaarutigineqarpoq. Tamatumalu kingorna ingerlatseqatigiiffimmut eqqaasitsisoqartarsimagaluortoq eqikkarlugu oqaatigineqartariaqarpoq,

ingerlatseqatigiiffiup ajoraluartumik aatsaat piffissap tusarniaaffiusup naalernerani uppernarsaatissat tamanit pissarsiarineqarsinnaalersissimmagut.

Ingerlatseqatigiiffiup innersuussiviusunut uppernarsaatit taaneqartunik kingusissorujussuakkut tamanut ammasumik saqqummiussineranut peqquataasoq sukumiisumik ilisimangilara.

3) Paasissutissat kingusissukkut tunniunneqarneranni tusarniaatitsinermi piffissaliussaq sivitsorneqassava?

Aap, piffissap tusarniaaffiusup sivitsorneqarnissaa aalajangiunneqarpoq. Piffissap tusarniaaffiusup 6. januar 2014-imut sivitsorneratigut, soqutiginnittunit arlalinnit piffissap tusarniaaffiusup sivitsorneqarnissaanik qinnuteqarteqarnerannut tapersiinarlutik Naalakkersuisut 5. december 2013-imi aalajangerput. Soqutigisaqartut attuumassutillit toqqaannartumik nalunaarfingeqarput. Kisiannili kikkut tamarmik 6. februar 2014-ip tungaanut Tanbreez-ip VVM-imut nassuiaatissatut missingusiaanut oqaaseqarnissamut periarfissaqassapput.

4) Naamiuppat: suna tunngavilersuutaava?

Apeqquut 3-mut akissuteqaatiga innersuussutigissavara.

5) Tusarniaatitsinermi piffissap naalerneratigut taamak kingusitsigisukkut paasissutissanik attuumassutilinnik tunniussineq tusarniaatitsinermut pitsaasumik ingerlatsinissamut naapertuuppa?

Apeqquut 1-imut aamma 2-mut akissuteqaatikka, itisiliiffiusumik oqaaseqaateqarfiusut innersuussutigalugit oqaatigissavara, najoqqutassat Namminersorlutik Oqartussat tusarniaanermut iserfissiaatigut saqqummiunneqartut tamakkiisutut aammalu tamanut ammasumik tusarniaanissamut naleqqulluurtutut isigineqartariaqartutut Naalakkersuisut isumaqarmata. VVM-imut nassuiaatissatut missingiut suliassap avatangiisinut sunniutissaannik tamakkiisumik takussutissiinersut, aammalu missingiutip ilusiligaanerani imaanilu aatsitassanut inatsimmi piumasaqaatit malinneqarnerisut tamatigut aalajangersimasumik nalilerneqarsinnaavoq. Tamannalu suliame matumani aamma pisimavoq.

Naggasiutigalugu ilisimatitsissutigisinnaavara, piffissap tusarniaaffiusup sivitsorneqarnera TANBREEZ Mining Greenland A/S isumaqatigilluinnarlugu aalajangiunneqarsimammat.

Inussiarnersumik inuulluaqqusillunga

Kim Kielsen